

## **UVODNA RIJEĆ**

Svrha je ovog udžbenika da na pregledan način izloži osnove marksističkog učenja za potrebe studenata I godine fakulteta i za studente viših škola čiji je studij marksizma koncipiran na programskim osnovama po kojima je rađen i ovaj udžbenik<sup>1</sup>). Prihvatajući se njegove izrade, autori su bili svjesni rizika koji prati elaboraciju djelatnosti ovakve vrste općenito. Budući, naime, da je savremeni pristup marksizmu mnogostran, naročito poslije kritika njegovih dogmatskih interpretacija, onima koji izlazu njegove osnove uvijek se može prigovoriti bilo uklon ka nekom od klasičnih tumačenja, bilo radikalizam u njihovom odbacivanju. Teškoće počinju tamo gdje pojedini kritičari, čvrsto uvjereni da je njihov pristup baš onaj pravi, iskazuju visok stepen netrpeljivosti prema svim ostalim pristupima. Često nesvjesni da na taj način i sami nalaze u nove oblike dogmatizma, oni faktički isključuju mogućnost dijaloga, što onda otežava komunikaciju među samim marksistima:

Autori stoga napominju da su ovaj udžbenik pisali u skladu sa svojim spoznajama prirode marksizma i sa vrijednosnim sistemom socijalističkog samoupravljanja. O kvalitetu njihove izvedbe svoju će riječ kazati kritika, a na nju će autori moći odgovoriti samo onda ako ne bude ekskluzivistička i ako svoje stanovište ne bude htjela da apsolutizira nego da konkretnim primjedbama i sugestijama doprinese da neki sličan poduhvat bude još bolje obavljen nego ovaj. Treba imati u vidu da u kontinuitetu marksističkog obrazovanja nedostatke svakog udžbenika treba posmatrati u kontekstu činjenice da se svi skupa još uvijek nalazimo u traganju za trajnjim rješenjima i da razlika u pristupima nikako ne mora da pretpostavlja i njihovu uzajamnu negaciju. Svjesni takve situacije, autori ovo djelo predaju javnosti, spremni da prihvate svaku kritičku platformu koja će doprinijeti daljim uspjesima u obavljanju zajedničkog posla.